

四庫全書

集部

欽定四庫全書

文敏集卷二十三

明 楊榮 撰

墓誌銘

故河間王夫人王氏墓誌銘

夫人姓王氏字慧明元樞密院判執中之女贈奉天靖  
難推誠宣力武臣特進光祿大夫右柱國追封榮國忠  
顯公進封河間忠武王張公世美之配今奉天靖難推  
誠宣力輔運佐理武臣特進光祿大夫左柱國太師英

國公之母也生元至正乙未十月八日自幼端淑純誠  
穎敏慈惠為父母所鍾愛及笄擇配歸于河間王事夫  
順而義奉舅姑孝而敬理家勤儉教子嚴明待親族和  
而有禮撫僮婢寬而有恩尤好善樂施內外疏戚罔不  
稱其賢王初為北平都指揮同知從太宗皇帝靖難累  
建奇功死義東昌內難既平太宗隆報功之典錫爵上  
公夫人封榮國夫人仁宗皇帝嗣位軫念舊績再錫王  
封夫人封河間王夫人時年已七十康寧彊健命服煌

煌人莫不以為榮而夫人若固有之未嘗有矜大之色  
歲時子孫為壽必從容語之曰高而不危滿而不溢所  
以長守貴富也汝輩宜識之子男三長曰輔即太師次  
輓神策衛指揮使次輓錦衣衛指揮同知女一太宗冊  
為貴妃孫男八長曰忠授勳衛次某某某某其孫  
女八長為仁宗敬妃次適清平伯吳英餘在室曾孫男  
三人正統己未四月十有八日夫人以疾終於正寢享  
年八十有五訃聞賻贈優厚屢遣禮官臨祭卜以是年

某月某日奉柩與王合葬於順天府宛平縣京西鄉太師豫以銘屬予嗚呼忠武奮勇效勞蹈匪躬之節歸然靖難勲冠人臣而夫人為之配太師繼美策功經邦論道衰然四朝元勳之傑而夫人為之母婦道著於夫母德顯於子世為國戚壽考令終榮哀備至推今考古豈有多哉是宜為銘以昭永久銘曰

樞密之先累善儲祥是生夫人柔惠端莊年甫及笄作嬪于張有偉君子維忠武王桓桓忠武蹇蹇匪躬肇膺

公爵荐登王封夫人偕茲天寵實隆康寧壽考榮哀始  
終顯允太師為嗣之賢猗歟皇妃為女之媛惟子惟孫  
有永其傳藏銘幽宮垂千百年

太恭人康氏墓誌銘

福降自天惟有德者始克全之德備諸身而無有諸福  
者於今右通政李君錫之母康氏太恭人見焉太恭人  
實有令德婦道母儀為姻族楷法其年九十有六受封  
于朝而享其子之祿養康強和裕而以天年終其於五

福誠可謂全矣錫將歸葬以其僚友左叅議虞君祥所為狀來請銘予親且舊其可辭乃為叙而銘之叙曰康氏在元為燕京著姓其諱仲名仕為翰林學士者太恭人考也許氏以賢淑稱者其妣也元季兵興學士攜家寓陝右後遂占籍為陝右人太恭人自幼聰慧喜讀書於往昔賢婦貞女嘉言懿行服履不違尤閑女事紡績織紝務極精緻父母賢之擇所宜歸得故贈中憲大夫右通政李公榮既歸李氏恭順以事夫勤儉以理家撫

僮婢以慈仁待夫族姻務中禮節歲時伏臘相祀事必恪而誠旦暮訓誡諸子必肅而嚴錫遊邑庠出任教職擢為禮科給事中而中憲君卒錫歸終喪制太恭人必勉以忠謹期以遠大服闋進通政司右叅議正統初奉命祀西嶽便道歸省時太恭人年雖高而尚無恙間語錫曰吾齒落更生飲食如舊爾無我憂宜益殫爾職以報國恩錫還朝無何遷右通政於是太恭人夫婦歿者有贈存者加封邑里咸以為榮歲己未二月廿六日甫



昕得微恙瞑目而逝訃至有司以聞上特命往襄事即  
起復錫歸卜以其年某月某日祔葬于豹坡山中憲君  
之瑩子男五人鐸鐸錫鑑銘鐸鐸早世錫享天祿女三  
人同邑傳祥董傑表端其壻也孫男十四人琰琮瑛珍  
璫瑄琳璟璋琬瑞瑤玉閏孫女五人福英壽英錦蘭綉  
蘭蕙蘭曾孫男二人曾孫女一人嗚呼自古有德者必  
受其福太恭人生為淑女為命婦為賢母宜天錫多福  
以表裸其德也銘曰

康氏在元職典絲綸伊誰之考維太恭人考賢妣良是  
生淑女厥淑云何幽閒中處婦功之修婦道之行克相  
君子家底于成有偉其嗣荐登崇顯綸誥推封國有常  
典象服是宜煜煜煌煌閨門之表閭里之光壽及百年  
奄然去世五福俱全無憾無愧豹坡祔葬考卜維宜後  
千百祀視此銘詩

戶部員外郎張君墓誌銘

永樂甲辰戶部廣東清吏司員外郎張君賓暘以疾乞

謝事賜冠帶還鄉醫治宣德癸丑十二月乙亥卒于家  
享春秋六十有七遺命嗣子紹請予銘墓君在朝時與  
予交厚義不可辭按狀君諱昕賓暘字也官以字行別  
號林岫宋相商英之後有扈蹕南渡者家於杭高祖隱  
庵居士始徙松江曾祖號南山祖號碧雲世韜德不耀  
母吳氏君生有竒姿六歲就外傳語以善惡禍福之說  
即悟其旨授之書誦習不少怠侍於長者揖讓進退若  
成人稍長父或命之家政措置有方鄉儒孫大雅王叔

明見之咸以遠大期焉年十四姑之夫違訟詞連其父  
君代父繫獄與辨得白未幾受賕吏誣指贓物寄其家  
於法既徵贓仍坐輸作君又代父之京訴得免輸作人  
稱其孝洪武戊辰以才行徵授殿廷儀禮司序班在職  
恭慎尋以親老歸侍家充萬石區長君遣弟姪督細民  
輸租必以時務從寬厚不尚苛急租外有費皆出已資  
不一毫斂於人歲或旱澇憂稅無徵悉發已廩代之輸  
又築室高阜地出貲資貧人俾之貨殖以取給人多德

之永樂甲申蘇淞水戶部尚書夏公奉命往治以君輔  
行時吳淞舊江淤塞滋久疏浚為難君請開范家浦以  
洩浸淫用工省而除患易夏公從之民賴其利丁亥有  
薦之于朝遣中官召至入覲于武英殿奏對稱旨命光  
祿賜膳授戶部福建清吏司主事西域大寶法王來朝  
選廷臣往迎以君好善執禮遂命之己丑通政趙君任  
治農于蘇淞等六郡以澇聞時仁宗皇帝監國以君諳  
其地宜命往佐之時立秋己旬日有司尚督民車水君

至則曰此過時不能成禾徒勞民也白通政悉散遣之躬行原隰示以水利蓄洩防患之宜民甚便焉召還陞本部廣東清吏司員外郎經畫政務凡可以利民者知無不為卿佐咸加器重君前後在官悉辭俸出使于外未嘗食官廩九載將叙遷而以疾歸家庭之間雍睦整肅處鄉黨無驕矜而樂賑施饑窘者子之粟病者子藥死者子棺宿負不能償者燬其券開義塾教里中子弟橋道傾圮者捐貲修之遇荒歉輒為之惻然歲旱嘗禱

於神獲雨其志於濟人盖若是君襟懷夷坦接賢士大  
夫情文兼至自少精於奕晚喜釋老之學閒與名僧羽  
士相往還甫六十即治壽藏其達於死生之故又若是  
娶盧氏早卒繼王氏俱無子先育表弟之子繼表姊之  
子嗣今以紹為後君從弟子也葬以某年某月某日墓  
在集賢鄉鳳山之原銘曰

宋相之後再遷于松其積也厚其培也豐世富於貲至  
君始仕為屬司徒荐膺任使官不食祿志在濟人弛害

興利惟敬惟勤篤于孝忠樂善好施進退顯榮終始一  
致身之沒矣德則孔彰銘詔爾後善嗣勿忘

故陳處士墓誌銘

永樂戊戌春正月二十三日金華陳處士卒于家其子  
中書舍人茂時扈從北京聞訃將歸葬持國子司業貝  
泰所述處士之行泣請予銘按狀處士諱誠字信中其  
先出漢太尉蕃蕃之後有為汝南都尉諱澄者居蔡之  
平輿唐昭宗時曰讜議避黃巢之亂徙浙之烏傷清泰



中曰曾復遷金華由是為金華人然其族至今稱平輿  
陳氏處士少孤賴母張氏鞠育之從伯父堯芝學既長  
克自樹立里有王與權者故魯齋文憲公之裔聞處士  
孝友以其女妻之處士事伯父盡愛敬及卒為營喪葬  
克盡其力性雅淡好問學恂恂謙退與物無忤鄉黨稱  
為善士所居芙蓉峯下泉石清美滋蘭種菊布衣韋帶  
日徜徉其間每慨然曰吾得老此足矣乃顏其室曰知  
止軒初曾葬金華北山子孫昭穆相祔者百餘墳號陳

百墓有田以供歲祀宗人掩為已有處士奮然以大義復其田由是烝嘗不缺尤樂交賢士大夫若汪潤之汪可名諸儒者每款門必談論移日或至夜分乃罷無厭倦之意子茂初以善書選入翰林每寓書戒其謹飭勿怠肆及為中書舍人嘗至京就養旬朔休暇必誨諭諄切大要欲其盡忠効報其卒也命家人具湯沐梳盥衣冠端坐而逝遺言訓子茂等益切不及他事處士生元至正丙戌四月二十七日享年七十有三子男五人長

即茂次安陰陽學正術次可次文次奠女一人適王淵  
孫男四孫女二以是年九月二十六日祔葬于赤松鄉  
七世祖宋大理卿墓右曾祖諱端祖諱英世有隱德父  
禹壁仕元開化尉銘曰

平輿之宗世赫奕烏傷金華胃愈碩處士承之綿世澤  
隱居樂善甘澹迹原初要終瞭不惑凝然而歸返玄宅  
迹幽德昭允是式後有考者視斯刻

故大理寺右評事陳以義墓誌銘

閩之著姓其先世多光州固始人蓋自五代時從王審知入閩遂家于此今長樂古槐陳氏其一焉陳氏歷宋涉元衣冠相望至國朝有諱銘字以義者實其裔也以義之祖諱汝謙考諱則文皆隱德弗耀母潘氏邑之名族有賢行以義始生當元季擾攘流離奔竄弗克自保迨至髻亂適四方平定文運誕興將謂身際太平得以遂其有為之志不幸早失所怙家道荒落與兄震奔走經營日弗暇給既得葬其先人而母尋患風疾久卧弗

起以義同兄晨夕扶持求醫禱神日奉食飲湯藥弗少  
替既而母語以義曰吾久病非旦夕可愈爾兄一人侍  
奉足矣爾年尚少且自幼穎敏宜立志讀書將期顯親  
揚名以振家聲毋以吾病為念且廢汝之學也遂命入  
邑庠為弟子辛勤刻苦日有所進隆師親友各得其道  
同舍生有貧困弗克自給者則相率出財以濟之入則  
事母與兄孝友無盡出則與宗族鄉鄰相接謙謹有加  
家雖儉薄而相其兄奉祭祀待賓客皆極豐潔儕輩悉

推重焉學既成乃入貢為太學生志節彌著時同郡友  
鄔孟為監察御史得罪誅其妻王氏當沒入官乃自經  
死人皆憚法莫敢視以義獨收瘞之其鄉人或有客死  
無依者皆為之殯葬凡震為人所誣逮至京師以義力  
為伸雪後竟得直洪武丁丑擢湖廣衡州府推官聽斷  
公明遇疑獄即從輕典嘗曰古者罪疑惟輕又曰與其  
殺不辜寧失不經尤以廉慎自持惟守其月俸之入以  
自供一毫無苟取繼丁內艱去職民皆挽留弗得則涕

泣以隨之永樂癸未服闋沔陽知州王孟薦其才遂擢大理寺右評事授文林郎凡獄囚有冤抑者悉為之詳讞務得其平乃已莅職三年聲譽籍甚歲丁亥九月二日以疾卒于官僚友咸悼惜之生元至正壬寅五月四日卒之日享年四十有六娶同邑林氏有淑德以義之卒也二子三女俱幼林氏扶其柩匍匐歸鄉以明年戊子某月某日葬邑之蘿墩下村先塋之側訓育其子女以底于成長子曰璉克持家事次子曰京舉辛丑進士

任浙之縉雲知縣有能聲長女適林祐次適潘綱次適程鄉縣學訓導馮實皆同邑士族也孫男四蕓芳芮萼孫女一茲京以考滿來京慮其先人之德湮沒無聞乃屬監察御史陳叔剛述其父之行來請銘予弗獲辭遂撫拾其大槩而為之銘銘曰

有媯之裔實家固始乃從審知長樂是徒偉哉其嗣自幼而孤孝友篤至張仲同符幼學壯行素既有志仕轍方亨青雲騏驥况當明時足展其才中道而踣孰不興



哀相成厥家惟有賢配厥嗣克承聲光弗替蘿墩之山  
其高嶙峋勒銘貞石用告後人

習母孺人吳氏墓誌銘

婦處閨閫而賢否未易窺惟夫得內助以培植厥家子  
承慈訓而有譽於時然後懿德賢行可得而徵也若故  
習母孺人吳氏可謂克相夫教子而信為賢者矣孺人  
諱某臨之新喻望族之裔祖憲章父有諒皆隱居修德  
鄉稱善人母晏氏柔淑端靜為吳諸婦儀範孺人幼而

慈良長而禮順祇服母訓斯須不違治女事不以寒暑少怠既笄父母以歸于故封翰林編修文林郎習君懷恭恪持婦道孝養舅姑洪武中文林君用薦分教南雄瀏陽平江諸學家政一以委孺人事舅梅隱翁若事父然時賓友過從無虛日躬治菽具畧不厭怠姑嘗教諸女曰汝輩他日適人能如爾嫂方可為賢婦舅姑既沒相夫葬祭以禮鄉黨稱嘆永樂丁酉文林君擢掌教湘潭始從官居衣服飲食率從儉節日工女事如少壯時

洪熙乙巳以子嘉言貴朝廷錫恩封於是文林君去職就封與孺人偕老于家冠服煌煌鄉里瞻望以為榮宣德丙午文林君捐館嘉言歸終喪制嘗語之曰吾聞郡邑仕者往往以清慎致遠大貪墨就顛覆爾宜知所勸懲庶上不負國家下不忝爾父嘉言服除仍厥職疏乞分祿為養得請遂月給於縣庾孺人遺書諭曰荷蒙國家恩封又獲祿養此固汝克立所致然汝當勉圖報稱以殫臣子之道嘉言服訓惟謹將乞假歸省奉觴膝下

為八表之慶而孺人以正統戊午十月廿有九日得疾卒于家距生年七十有九子男三長曰經字嘉言登戊戌進士官翰林累陞侍讀次約次緘咸克世其家女一適彭邦憲先孺人卒孫男六人褒表裘衷某某孫女一人適章良劭曾孫男某曾孫女某嘉言聞訃哀毀不勝間謁予泣而告曰先妣仁慈儉勤樂濟貧之恩卹幼弱及僮婢俱不失其歡心內而宗姓外而親黨為婦者莫不仰式比以衰暮得疾而經弗獲躬侍湯藥以罄子職

罪莫大焉。冀先生賜之銘以彰先妣懿行於不泯。以慰神靈於地下。庶不孝之罪為少。逭也。惟嘉言予素所知者。其母之賢。又夙所聞也。故不以老倦辭。勉次其行實而為之銘。銘曰

易家人兮。利女貞。顧所繫兮。良匪輕。婉婉孺人兮。賢足稱。慈良靜專兮。自天成。相夫君兮。婦道行。理內政兮。和以平。子才而賢兮。官于京。龍章下錫兮。沐恩榮。煌煌命服兮。珠翟明。母德之著兮。斯有徵。壽踰古稀兮。身康寧。

宜承祿養兮躋百齡馭靈風兮溘遐征魄下降兮魂則  
升縹緲山兮卜茲塋垂慶澤兮福雲仍後之人兮思儀  
刑欲考其詳兮在斯銘

故資政大夫工部尚書李君墓誌銘

士之生世遭際隆興之運得以宣力效猷致位通顯光  
及先世而恩榮無間於始終者若故資政大夫行在工  
部尚書清苑李君是已君諱友直字居正先世家隴西  
元季弗靖君之曾大父山始自隴西徙保定清苑之柳

林莊因家焉祖彥名考仁義俱以君貴贈資善大夫北  
京行部尚書祖妣臧氏妣杜氏俱贈夫人君生洪武己  
酉十一月二十有一日自幼謹厚不事嬉戲動止儼若  
成人甚為父母鍾愛暨長讀書通大義兼習法律遇事  
勇為不計利害太宗皇帝舉義靖難之初君時從事北  
平藩司首發密事用是深契宸衷遂擢藩佐之職贊翌  
居守攄誠效勞禦敵之方扞城之具罔不周備永樂紀  
元肇建北京設行部以君為左侍郎及營宮宇承命綜

理沿河輸運諸務悉心殫慮雖隆寒盛暑不替利興害  
去人咸德之竣事調任行在工部益効勞勤仁宗皇帝  
嗣位追念舊勞拜行部尚書未幾奉命代祀秦中前代  
陵寢還朝懇懇以軍民利害為言深承眷遇尋頒誥命  
贈君祖考如所受官龍光煌煌賁及泉壤鄉邑莫不以  
為榮宣廟繼統改任行在工部命往西蜀總董夫匠鳩  
工料材寬不至於縱嚴不失於苛軍民便焉自是凡有  
營建一以董督之任委君君益恪承上命夙夜敬慎撫



循慰勞人忘其勞而事畢就今上皇帝臨御屢勅君繕  
葺京倉及濬築通濟等河施設措置智力弗衰正統戊  
午九月四日以疾卒於官訃聞上為嗟悼賜棺諭祭仍  
勅有司營葬事其子昉卜以是月二十有七日奉柩歸  
葬於邑某鄉之原吏部尚書郭公與君同里交久且厚  
遂具述君之世系履歷之詳請銘於子惟君為人謙和  
坦直自筮仕迄今幾四十年小心慎密弗踰禮度待人  
接物一以至誠處宗黨姻戚各盡其道人有善則稱之

不置有過為之掩覆冀其自改祿俸有餘悉均於族人鄉里有以不給告者即捐貲贖之教諸子事耕讀以足衣食餘無他營識者以是多之娶臧氏先卒贈夫人次劉氏王氏俱有賢行子男三人長即昉次曰暉臧所出也曰暘王所出也女二人亦出於臧長適府軍前衛指揮使徐震次適保定右衛指揮同知王原孫男四人璫琰璿珪孫女二人在室曾孫男四人源潔清濬曾孫女一人尚幼嗚呼君以淳實之資明敏之才仕歷四朝位

列六卿崇及祖考慶流後世豈多見哉是宜有銘銘曰  
李居隴西有繁其先君曾大父清苑肇遷爰及厥考世  
積厥德德積既久其發以赫厥赫云何維時之逢無時  
奮興在君之躬君有所獻式協廟筭擢佐藩司維楨維  
榦於皇太宗崇德報勤超拜亞卿以旌厥忠司空之命  
實自仁廟一其忠勤罔間先後光華尊榮甫四十年今  
雖云亡夫何憾焉蕃蕃子孫受君之慶惟慶之流彌久  
而盛有義其墳樹之堅珉勒此銘詩以詒後人

封太淑人李母王氏墓誌銘

正統戊午秋八月十有九日嘉議大夫通政使長安李君暹之母太淑人王氏以疾卒於家享年九十有三訃聞朝廷遣官賜祭命有司為營喪葬嗚呼可謂獲福之備者矣夫福有五壽富康寧考終命四者繫於天其存諸人者攸好德而已德有厚薄故福之錫有備有不備焉太淑人生長名族在父母家孝於其親慈惠寡言聽從姆教組紉織紝諸女皆不及既笄歸李氏事舅姑如

事父母相夫以禮和宗族睦姻親皆有恩意尤勤女紅  
夫聚先卒極於哀痛悉其所有以畢葬事教諸子治生  
就學各隨其材以暹聰敏遣就學邑庠凡家務一不相  
干惟恐有妨其學每語之曰學必勤而後成或作或輟  
非所以為學也汝其砥勵厥志庶他日足以昌大李氏  
之門暹服膺弗忘洪武己卯遂以明經領鄉薦入太學  
初擢戶曹主事秩滿陞郎中累遷至今官出使外蕃入  
掌錢穀皆有能聲蒙恩封贈二親於是太淑人存而有

光為之父者歿而有榮暹自筮仕迄今太淑人享其祿  
養幾四十年嗚呼誠可謂全福也已世之人或膺壽考  
而不得祿養或得祿養而多疾疢抑鬱弗寧皆不得謂  
之全福也太淑人自幼至長精爽不替老而耳目聰明  
動履彌健又榮膺冠帔之錫煌煌金緋瞻望輝華乃幾  
百歲而以令終既終復沐身後之榮自非德福之厚能  
如是乎其生元至正丙戌五月二日子男四人長曰遜  
次即暹曰遇早卒季曰達女二人長適咸寧雷其次適

同里宋某皆鉅族也孫男十有四人孫女十人曾孫男  
女七人卜以是歲某月某日祔葬於某山先隴之次暹  
預以銘請嗚呼太淑人克孝克敬又善訓其子以致通  
顯為婦為母之道美矣是不可以不銘銘曰

昔人之生百年為期九十有三今世則稀匪年之稀亦  
備諸福矧有賢子政修行篤遭際明時龍章自天曰贈  
曰封光寵煜然婦道之純母德之備奄然以終夫復何  
愧夫復何愧始終之榮告彼後人式觀斯銘

故通議大夫資治尹行在吏部右侍郎鄭君墓

誌銘

士君子遭時得位才行兼茂克舉厥職上無負國家下  
不負所志人皆仰其存而哀其歿者斯豈多見哉若故  
通議大夫行在吏部右侍郎鄭君蓋其人也君諱誠字  
文實世家建昌之南城高祖禎仕元為撫州路醫學學  
錄曾祖德銘歷彭澤南陵二縣典史祖瀚遠以君貴贈  
吏部右侍郎父守中累封吏部右侍郎妣王氏累封贈



淑人君生洪武庚午九月十日自少立志問學選為邑  
庠生究春秋之旨同輩自以為莫及永樂辛卯領鄉薦  
入為太學生夙夜淬礪器宇日充歷政冬官以勤慎自  
効擢為吏部司務於職克稱尋以侍郎師達薦陞考功  
員外郎君雖年少居要職懋履謙恭事先輩以禮課功  
責實無所徇人以是多之未幾丁內艱痛念母疾弗克  
躬侍湯藥哀毀逾禮及葬陰雨不止君號泣籲天天稍  
霽人以為孝感所致制未終特起改文選員外郎尋轉

郎中時同官孫英號稱狷介少許可於君獨加敬讓洪  
熙紀元受誥命榮及二親宣德丁未歸省還朝仍故職  
庚戌以少師蹇公薦為吏部右侍郎選任精審敷奏詳  
明尤為衆所推宣廟嘗召問庶官品級及居職者賢否  
君歷對稱旨遂受寶帶襲衣之賜今上皇帝嗣位益致  
公勤雖故舊執贄相見亦却而不納鄉人有為太學生  
者於君有宿怨及當受官自謂必見抑君惜其才擢寘  
五品其所守所行類如此正統戊午十一月一日以疾

卒於官自鄉士以及僕隸莫不嗟惋翌日上聞為之悼  
惜遣禮部尚書胡公致祭仍命有司治葬事君娶黃氏  
有淑行初封宜人進淑人子男一曰廔女一在室弟某  
來自南城將奉柩歸葬於鄉山之原乃以刑部侍郎何  
君文淵所述事行謁拜請銘惟君天性孝友父嘗邁足  
疾繼以目眚君憂形於色遍求良醫得善藥輒附傳以  
歸療之疾遂愈奉繼母傅氏淑人不異所生遇諸昆弟  
及從昆弟俱有恩位雖貴顯歸拜舊師惟執弟子禮見

其貧厚遺以金緡待僮隸亦未嘗加以疾聲厲色居官二十餘年小心慎密始終如一至其寬厚和易虛已容人識達政要旁行不流卓卓乎有足稱者是不可不銘

銘曰

麻姑之山秀擁一方下有盱水其流洋洋維水之清維山之英孰其鍾之天官亞卿亞卿之生人中裛然師竒其敏友推其先肇自小官荐登顯庸弗倨弗隨克勤克公勤不自盈公而生明鑒別妍媸衡審重輕天子曰嘉

是為能臣輿論攸歸咸曰偉人生不失榮歿不失哀悠  
悠逝川去不可回勒此銘辭閱之幽宮惟千百祀令名  
罔終

故承事郎永豐知縣董孟聲墓誌銘

惟世之士登名科甲身躋顯融者殆謂榮矣其或低回  
歲月淹延卑秩而文學之是任政事之是勤又為時論  
所與者詎不為榮哉觀之孟聲蓋可見已孟聲諱庸姓  
董氏初號安遇生晚號臞菴杭之仁和人曾祖某祖某

考均義連世不仕妣李氏孟聲自幼穎異長遵嚴命遊  
邑庠學春秋德業日進為師友所推擢永樂甲申進士  
入翰林為庶吉士官奉祠正於晉府屢見獎與久之改  
訓導於閩之順昌丁外艱服闋調建陽所至克舉師道  
造就賢才比秩滿去建陽諸生封章上聞願留以卒業  
乃從復任尋丁內艱調蘇之嘉定教鐸益振正統丁巳  
太僕少卿沈升薦其才賢陞廣信永豐知縣到官勵政  
理勤撫字尤尚慈惠人謂不負升所薦歲己未上計入

觀遽卧疾卒於旅舍正月二十五日也聞者莫不悼惜  
孟聲生洪武戊午八月二十八日至是得年六十有二  
配顧氏有淑行子男二曰璠曰璣女四珍歸兵部侍郎  
于謙累封淑人瓊歸王訥瑩媿俱在室孫男三曰文曰  
庠曰序女二孟聲平生篤孝友親存則能順承厥志親  
歿則葬祭悉循於禮撫二弟極歡愛為人恭謹不妄言  
動或與人相即則和氣藹如恒慕董生召南之為人因  
扁所居為安豐堂以見己志素負學識嘗與考山東南

京鄉試甄別士類輿論韙之所著詩文若干卷藏於家  
尤善書道勁可愛其卒時璠在侍將奉柩還葬於里中  
仙芝嶺先塋之側乃狀其行實匍匐來乞銘用昭不朽

銘曰

皇朝隆興運臻文明設科取士海宇蜚英孟聲奮志時  
乎遭際永樂初科衰然擢第玉署彤邸歷被清光改職  
師儒令譽載揚晚乃用薦作宰百里政用有成人懷豈  
弟善教善政孰克兩全於乎孟聲著稱煜然惟其有之



垂休身後昭茲銘章永世不朽

贈奉議大夫考功郎中夏君墓誌銘

國家隆封贈之恩凡仕者之父母存歿俱被光榮者予於夏君宗文暨厥配鄭氏見矣宗文嘗以子衡貴贈徵仕郎行在中書舍人加贈奉議大夫行在吏部考功郎中鄭封太孺人加封太宜人宗文之卒葬於華亭集賢鄉彭家庄之原已二十八年而墓未有銘迄今正統己未二月二十有二日鄭氏乃卒於北京官舍衡將奉柩

以歸合葬焉乃以大理少卿沈君民望所狀世出事行  
泣拜謁予銘衡從事內閣且在經筵侍書予朝夕相親  
既久義不獲以衰邁辭用撫其槩而銘之按狀宗文諱  
文別號醉漁世家華亭曾祖某祖福父彥容咸有隱德  
宗文幼失怙賴母顧氏訓育性敏嗜學從鄉先生張夢  
辰游習詩律有奇語兼攻漢隸章草弱冠為郡庠生後  
以母老辭洪武庚午坐累謫隸戍籍尋以疾代還與鄭  
氏養母篤孝敬務得歡心迨卒葬祭無違禮而思慕不

忘每語及則流涕教二子各以一經永樂丁亥以楷書  
被召預修永樂大典暨寫勸善書事竣授主廣平縣簿  
佐理有方庶務畢舉公餘輒造學宮策勵生徒獎善止  
惡士風為之丕變既而董役營長陵永樂壬辰四月七  
日得疾卒享年四十有七子某扶榭歸葬所著有長淮  
醉漁藁若干卷藏於家鄭氏諱善性行端淑工女事善  
順承其親及笄歸宗文勤于內助服食必中節宗文既  
卒始遣二子相繼就學郡庠家窶無以供所需親率子

婦勤紡績為助衡既貴嘗語之曰居官宜清儉雖疏食布衣吾不厭也又曰爾幸際遇得近日月之光宜竭誠以圖報稱尤善睦族嫻賑貧乏惠恤卑弱卒之日晨興盥漱端坐而逝享年七十有二子長曰正由丁酉鄉貢擢奇嵐州學正娶范氏俱先卒衡初任中書舍人陞考功郎中娶顧氏封宜人二女長適禮部主事龔定次適府庠生俞宗善孫男一早卒孫女四銘曰

猗歟宗文少孤孳孳邁罹非辜艱屯荐更亨自壯年無

何而傾雖曰傾矣不泯者名厥名伊何佐縣政平鬱鬱  
棠陰惠愛在毗有淑其配柔嘉而貞克相君子家爰以  
興二子受教各底于成伯司教鐸由歌鹿鳴仲官中禁  
累沐恩榮綸誥錫封靡間死生則同室死則同塋勒  
銘幽宮垂千百齡

故陳母孺人楊氏墓誌銘

予子壻陳順德母孺人楊氏以正統四年己未正月廿  
有三日卒於家順德時以會試寓京師訃聞泣而告曰

不肖早失所怙賴母鞠育教誨底於成人幸以一經第  
名鄉書違旦夕之養遠來欲取一官以為母榮志弗克  
遂而母遽以疾去世湯藥不獲躬侍殯殮不獲親見又  
無他兄弟以執喪負不孝之罪大矣今歸卜以某年某  
月某日葬於某鄉某山之原丐大人賜之銘以昭德垂  
後庶效子職之萬一言訖號慟不止予哀其意迺按吏  
部稽勲郎中蘇良金所述狀而叙之曰孺人諱枳字淑  
定鳳陽中衛知事楊和叔之女母吳氏有懿行洪武庚

申四月五日孺人生自幼溫淑端謹勤於女事不俟訓  
董尤祇承姆教能誦孝經列女傳記習不忘父母鍾愛  
之既長擇所配以歸鳳陽左衛知事陳某之子亨克執  
婦道奉姑鄒極盡孝敬娣姒姻族待之咸適其宜至於  
飯食衣服之節祭祀賓客之禮處之亦未嘗失序姑歿  
致哀相夫治喪葬無違禮族黨共稱其賢宣德某甲夫  
又歿痛哭屢絕久而後蘇順德時尚幼躬理家政惟勤  
惟儉事上接下恩禮兼至用是內外肅然而家業不墜

嘗訓順德曰汝父既歿承家在汝宜勵志於學庶他日有成而於父無忝時孺人從兄翰林修撰楊壽夫掌建安邑教乃遣之就學受春秋經宣德乙卯順德領鄉薦而歸孺人喜而戒之曰得此弗可自滿宜因所已得而求所未得可也暨將赴春官又語之曰汝不可以我老而懷依依之養當思顯揚以慰爾父於地下以悅吾心於生前可也聞者益嘆孺人之賢今孺人未及見子之仕膺一日祿養而遽歿是大可哀也子男一即順德孫



男二曰相曰樸孫女一曰懿嗚呼孺人以名家子歸為  
大家婦克盡奉姑相夫訓子之道誠女婦之賢者是不  
可以不銘銘曰

婦處於內雖賢曷徵克相克教乃當賢名嗟嗟孺人有  
淑其聲既翼於夫而家有成又迪其子而業弗傾今雖  
已矣其賢足稱勒石揚休垂千百齡

孺人彭氏墓誌銘

正統己未夏翰林編修廬陵陳文述其祖妣孺人事行

謁子拜且泣曰文幼失所恃賴祖妣撫育之恩弗獲效  
報萬一將謁告歸以奉旦夕之歡而訃音遽至文夙夜  
悲痛無所用其情惟請銘于先生俾淑德懿行垂先不  
朽庶幾少慰焉予嘉文能孝因按狀而叙之曰孺人諱  
淑柔姓彭氏廬陵儒家女自幼聰慧喜學孝經列女傳  
俱能通其大義於女事不勞姆教父體昇母楊氏愛而  
擇所宜歸以孺人無他兄弟遂納同里陳君弘德壻于  
家父母晚多疾孺人奉養篤至湯藥飲食必親嘗衣服

必親浣既歿哀毀踰禮相夫葬祭如儀鄉人嘆曰體昇  
夫婦有此女何異於子哉舅姑居家歲時屢迎養有一  
旨味必遣僮婢馳獻舅卒姑唐氏獨存迎養尤數姑安  
其孝或其子孫請歸必相泣而不忍別聞者稱焉治家  
以勤儉率下貲雖饒而不廢紡績服布素弗事華飾諸  
婦視以為法里閨宗戚敬慕者無間歲壬午室燬于寇  
贊相改築凡諸家政悉親綜理弘德不勞而事具客過  
飲饌豐潔若預知然性尤好施予見饑寒者即濟之永

樂甲申邑里旱歉丐者踵門輒命女奴詢其道里遠近  
而量給之弘德喜曰正吾志也每慮日用言動或昧於  
理而忤鬼神夜必焚香祝天以自省子孫由是皆知懼  
而益加操持故孺人自笄至老尊者悅其敬幼者感其  
慈賤者懷其恩內外疎戚罔不得其歡心歲遇壽旦親  
族捧觴祝壽者咸相謂曰孺人積德累善雖百歲不多  
也時夫婦俱無恙子孫盛而賢人以為善德之報是歲  
正月八日奄然而逝弔哭者日相屬又竊嘆曰孺人可

謂有福有壽矣子男一人字大訓以文貴封翰林院編  
修文林郎孫男四人長悅次即文又次曰敬曰定女五  
人某某其壻也孫女二人卜以歲冬某月某日葬于里  
之某山之原嗚呼孺人婦道修母儀著皆可書以傳烏  
可以無銘銘曰

猗惟孺人毓秀名宗有淑女德有美婦工既宜其親亦  
宜其夫恩禮周浹靡間戚疎為婦若茲孰不謂賢式穀  
厥後克光于先有光者誰實維仲孫仲孫徵銘不泯者

存山高而深土厚而堅藏銘幽宮垂千百年

故羅君宗讓墓誌銘

閩有好古力學君子曰羅君諱泰字宗讓別號覺非道人先世居江右撫之臨川其五世祖諱某仕元為福清縣尉子孫因家焉故今為閩人君之孝友行於家信誼重於人文章經術师表于鄉之後進居其門獲指教者往往取科名登仕籍嗚呼為人若君亦可謂難矣曾祖諱某祖諱某考諱伯淳世有隱德母楊氏君生洪武癸

丑八月十有一日早失所恃從鄉先生宋瑜受春秋經  
得尊王抑伯褒善貶惡大旨時丁家多難而母未葬布  
衣蔬食常如袒括之日語及則泣然下涕先是授徒所  
得悉以營冢壙既葬乃曰我情事少伸矣爰卒業于訓  
導林友從潛心易學卦爻十翼之旨研窮精索造詣閎  
奧嘗與故春坊諭德林尚默論易尚默稱之曰宗讓能  
先得予所未得一時同遊如進士鄭澄初主事鄭介叔  
知縣鄭彥韜文學鄭廷玉鄭希晦林範伯輩咸與切磋

講明互相裨益學乃大進鄉之後學皆師尊之弟澤亦  
登甲辰進士授監察御史其諸交游者往往出仕四方  
君獨隱居教授于鄉凡四十餘年生徒所造就者若林  
元美張偉皆以易登進士第其領鄉貢為教官者尤多  
有司奉朝命有所纂修必禮致君以董其事賢士君子  
至者必就見焉宣德壬子應天尹聘司文衡君辭曰吾  
以一鄉之善淑一鄉人則可其敢以布衣去取甸內士  
哉遂不果行家居衣冠整肅操觚執翰之外澹無他營



性好古道嘗嘆冠禮久廢銳志舉行從而化者甚多翰林編修薩琦父歿族人欲以俗禮治其喪君力贊其家一遵文公家禮以殯殮琦歸謝曰先君子之終免蹈非禮惟先生是賴至於其師林友從鄉老林崇高及里中有貧不克葬者悉倡率出財以助之凡事有得為而不為與不得為而為之者皆委曲勸喻使無後悔年甫四十配周氏歿義不再娶邑里高之正統丁巳次子繹及壻張諤俱以訓導歲滿得歸省為卜壽藏于閩東康峯

之寶林既成深衣藜杖徜徉其間命酒賦詩次為十詠  
喜曰吾終歸於此則死之日猶生之年也有寶林終隱  
集仍語繹諤曰汝二人身為國有母以我故久留也繹  
諤既上京師待選吏部而君以是歲四月十有二日卒  
于正寢享年六十有七卜以某年某月某日葬寶林子  
男三長統由太學生分教湖廣長沙府學娶林氏次繹  
由鄉貢士中乙榜分教廣東肇慶府學娶段氏繼鄭氏  
又次曰繪娶吳氏女一人壻即諤亦以明經任肇慶府

學訓導孫男五曰雅曰玄錫曰稚曰睢曰玄祐孫女五  
繹將奔歸襄事以諤所述事行謁予泣拜請銘惟士能  
力學好古雖弗躬有祿位而學淑諸人慶鍾于後壽考  
令終是可銘也已銘曰

有韞于中維學之充既淑其徒抑華厥躬躬弗顯榮而  
後乃昌二子具美分教大邦夫既有子又享其年安居  
祿養歿何憾焉寶林之東有墳在茲垂千百年維此銘

辭

乾  
健  
坤  
順

文敏集卷二十三

欽定四庫全書

集部

文敏集卷二十四

詳校官編修<sub>臣</sub> 裴謙

中書<sub>臣</sub> 劉源溥覆勘

總校官中書<sub>臣</sub> 朱鈐

校對官學正<sub>臣</sub> 常楮

謄錄監生<sub>臣</sub> 李翹鳳

欽定四庫全書

文敏集卷二十四

明楊榮撰

墓誌銘

定西伯夫人李氏墓誌銘

夫人姓李氏考諱駟母某氏世居金臺彰義門家世長厚以積善稱夫人生洪武壬戌十一月二十七日自幼聰敏端淑克勤女事父母鍾愛之年十八為之擇婿得同里大姓令奉天翊運宣力武臣特進榮祿大夫柱國

定西伯蔣貴遂歸之夫人既入門家室攸宜克盡婦道  
事舅姑以孝相其夫以禮閨門整肅內外雍睦宗黨稱  
之宣德間以夫貴受誥封夫人今復封伯夫人子男二  
長曰義次曰雄今以邊功擢千戶女二長適杭州前衛  
指揮使李剛次適密雲衛指揮使劉容孫男二曰璟曰  
琬女一尚幼正統四年六月十九日夫人以疾卒於家  
享年五十有八時貴以平西寇功佩平羌將軍印克總  
兵官鎮守甘肅訃聞皇上特加垂念遣官賜祭命有司



造墳恩德之厚無以加矣卜以是年十月初十日奉柩  
葬於彰義門泥井里之原嗚呼夫人德儀兼美膺受褒  
封顯榮始終世不多見銘以昭德不可無也乃為之銘

曰

懿哉夫人有美厥先善積既厚慶澤斯延是生夫人柔  
嘉靜莊為女之淑為婦之良克相夫君茂隆厥功乃殄  
羌孽乃進伯封子長干夫克奮忠義女獲所歸動必循  
禮婦德母儀夫人兼全存歿光榮復何憾焉哉哉新阡

密邇都門藏銘幽宮百世永存

明封徵仕郎中書舍人宋原亮墓誌銘

宣德乙卯六月辛丑封徵仕郎中書舍人宋原亮卒於家其子禮部主事琰奔訃將歸卜是年某月某日奉葬於鄉之日嶺山先塋之側乃述原亮行義詣予泣拜請銘予雖未識原亮觀琰之為人足以知其父之善奚可辭原亮諱亮號竹軒其先有諱嗣宗者邢之南和人仕唐為奉化令因家焉舊傳廣平文正公之後因名所居

之地曰廣平鄉曾祖其五積德行善隱居弗仕大父鄆山書院山長起潛父雙峯居士信義世以文行為鄉閭所重母蔣氏原亮生元至正庚子十月乙未自幼穎敏務學及長經史醫卜星命之書無不覽究居家以孝弟聞父患痢嘗糞而憂既卒哀毀幾殞兄原剛坐誣遠謫請隨行兄以其幼弱止之輒泣曰豈忍遽離吾兄耶遂同至役所代兄力作勞苦備至未嘗見於辭色兄歿棺斂歸葬如儀尤謹於祀先遇祖妣忌辰祭必盡哀喪

其配朱氏持服如禮或勸其再室原亮曰昔吾生再周  
失恃吾父終再不娶我奚敢違女弟家疫作俗忌相染  
無敢過門者原亮獨宿其家生者為治醫藥死者為之  
殯葬始終弗懈而竟以無事其待族黨幼長賓朋戚疏  
恩禮兼至捐財以助婚喪積粟以濟貧匱凡於義所當  
為者罔不盡心族里有乖爭欲構訟者必委曲開喻使  
之改悔由是人感其德而敬畏之有司春秋釋奠學宮  
每令攝分獻臨祭敬慎容止端肅諸生莫不取法焉性

雅尚正嘗感風疾人言禱祈可愈原亮曰吾素不為惡  
奚禱祈之有已而病亦愈琰始為邑庠生夙夜督勵以  
成其業及登永樂乙未進士第八翰林為庶吉士擢中  
書舍人遷今官屢以書誡勉之令盡厥職不語家事洪  
熙紀元得推恩褒封原亮如琰職琰得歸省升堂拜慶  
鄉人以為榮而原亮獨懷兢惕未幾琰被召命行戒之  
曰汝但盡心國事慎勿以吾老為念享年七十有六卒  
之日人無貴賤賢愚咸悼惜之配即朱氏贈孺人恭儉

慈仁先二十七年卒權厝於西布山今合窆焉子男三  
長即琰次璘次琬女淑瑛適同里陳文旰孫男五觀亨  
福身祿亨祚亨壽亨女二嗚呼原亮孝弟行於家行誼  
著於鄉而又克成其子顯宦於朝榮被恩命壽考令終  
蓋亦世之鮮者是宜有銘以昭來世銘曰

吁嗟原亮孰與儔孝友行誼追前修履道坦坦心休休  
有子擢科侍宸旒恩光寵命賁林丘身全五福日優游  
俯仰無愧奚所求嗚呼我銘表厥幽鄞江流水同悠悠

封大理寺副劉仲綸墓誌銘

士之佚老於鄉享有榮名盛福於治世非慶積其家而善修其躬者不足以致此觀諸大理寺右寺副劉仲綸蓋可驗已仲綸諱璋別號杏林西隱先世居長沙為士族宋季有諱勵叔者避兵於吉因家廬陵之高沙精岐扁之術子惠可世其業仕元為龍泉醫學官孫思敏曾孫鼎成仍遠於醫俱隱居終身而濟利之澤益厚矣仲綸鼎成中子也少穎敏務學祖母康病劇刲股和藥愈

之事父兄克供子弟之職國朝洪武中郡縣薦其孝友擢知一縣尋坐累罷歸事二親益孝起居飲食務得其懽心二親相繼沒葬祭以禮不用浮屠而弟季紳亦蚤沒兄伯經有疾仲綸篤同氣之誼不異爨撫視猶子逾於已出姑老無子且貧迎歸終養之久而彌謹嘗慕先世以醫藥濟人有疾者輒能赴之間出游淮浙荆陝之間比還而濟人之心益勤不懈然未嘗責報有貧不能自存者則兼濟以財用是人多德之暇日輒延賓友極



觴詠之娛而尤篤家訓遣長子英游郡庠受經英果登  
進士第官大理寺副讞獄多平反聲譽日著朝廷推恩  
褒封仲綸如英職暨英拜南京大理寺丞仲綸來視之  
申以守官盡職之戒諄懇切至聞者以其善訓子也比  
抵家遂嬰疾不起實正統紀元丙辰正月二十四日也  
其生以至正辛丑五月朔日享年七十有六母衛氏配  
王氏並有賢德而王亦以英貴封安人子男二人長即  
英次俊女三人適王志端蕭禮獨景皆望族孫男六元

亨利貞仁義亨蚤殤女五曾孫男吉祥英既聞訃哀慟  
匍匐而歸將以某年某月某日葬於某山之原奉事狀  
泣請銘嗚呼仲綸之善皆可稱於世垂於後矧以英  
惓之請烏得已於辭耶銘曰

維劉之裔初處星沙顯顯家聲簪紱之華爰及其後來  
徙于吉廬陵高沙從而卜室所積者善所業者醫以藥  
利人克普厥施傳及五葉曰仲綸甫匪直醫道篤率乃  
祖孝於二親友於伯兄老姑弱姪是愛是矜才足治劇

牛刀小試尋云退休優游終歲人有疾疢我從瘳之人  
有匱乏我從周之善之所為垂老益至有子在朝恩寵  
斯賁命服煌煌煜煜乎耿光曷以致斯積善之償我作銘  
詩勒於貞石用俾後人於此考德

兵部主事陸友仁墓誌銘

國朝置內閣切居禁近乃制誥所出而機務之繫莫重  
焉故從事於斯者非端重慎密之士弗克與矣宣德乙  
卯春兵部車駕主事陸友仁以薦得從事於其間友仁

今春坊庶子沈民望弟子也始由民望以楷書薦擢中書舍人九載考稱陞今官嘗與修兩朝實錄成荷文綺襲衣金幣之賜嗚呼友仁所歷踐誠榮矣其筮仕以及陞遷俱從事於翰林日邇清光優游歲月非他職僕僕簿書奔走旦暮者比也及入內閣予將期之遠大遽抱疾不起以是歲十月四日即世斯亦命矣夫明年正統紀元其弟宗義自其鄉北上將舁柩還葬遂以其僚友吏部考功郎中夏衡所狀行實拜予請銘友仁諱輔自

少穎敏讀書過目成誦喜吟咏字學尤所肆力者也為人寬和崇孝友在京師恒念親老不敢迎養請分常俸於家充具兄弟四人夙篤友愛友仁居官儉約衣止布褐而出徒步居雖樸陋處之裕如人因號之曰裕齋人或干以外務輒辭之不就及沒室如懸罄棺斂之具多出於故舊其生以洪武癸酉十一月十日享年四十有三世家華亭相傳為華亭侯遜所出稱簪纓家曾祖某祖某父文昌嘗仕宛平縣主簿有治績休官家居洪熙

時以友仁貴賜勅封中書舍人母計氏封孺人配陳氏  
封如其母子男四曰經曰纘陳氏出曰縉曰紳側室周  
氏出女一適里人胡綱亦陳氏出將以某年某月某日  
葬縣之白砂鄉故村之原嗚呼友仁蓋不可起矣予既  
素知其為人之善而以此在薦又烏得靳一言以銘其  
墓石也哉銘曰

陸氏之先侯封華亭以官為家子孫繩繩機雲以還世  
有聲譽詩書簪纓以永厥緒嗚呼友仁克光於前徽垣

粉署官以叙遷凡厥服勤克遵矩度縉紳之間令聞日著內閣優游榮幸駸深煜煜文翰用昭綸音式期永年一疾不起天耶命耶如斯而已胡村之原偉哉新墳銘以藏之爰示後人

都察院右僉都御史魯君墓誌銘

正統二年六月十日都察院右僉都御史魯穆希文以疾卒於官上聞遣禮部右侍郎章敞諭祭仍給舟歸其喪卜以某年某月某日葬於某山之原其邑人翰林修

撰杜寧為述其歷官行已之實來請銘希文嘗僉福建  
按察司事操行履歷予知之悉故不辭為叙而銘之希  
文宋散騎常侍澤之裔建炎初澤自汴徙居於嚴七世  
祖祁温州平陽令始自嚴徙天台遂為天台人曾祖古  
訓祖谷珪皆隱德弗仕考友敬以希文貴贈文林郎監  
察御史妣奚氏贈孺人希文自幼舉動異常兒里有識  
者語其祖父曰是兒他日當為偉器宜善教之稍長肄  
學邑庠攻苦食澹篤志經史雖祁寒盛暑不少休息嘗



自書人嘗咬得菜根則百事可做之語於座右蓋已毅然以清操自勵永樂丙戌登進士第勅賜歸榮於鄉因是益肆力問學鄉生執經受業者亦多造就及赴召有司贖鈔萬緡謝而卻之或曰行者以贖何用固卻希文曰筮仕之始未有益於鄉里而先厲之可乎言者愧服嘗覈江北諸衛儲糧巡兩淮鹽法及監龍江抽分竹木局綜理周密吏莫肆其奸既而以外艱去家居杜門哀毀逾禮服除拜福建道監察御史介然自持人莫敢干

以私時太宗皇帝巡幸北京仁宗皇帝監國希文屢上封事知者皆稱其為敢言又嘗鞫常州巨商法當死商家托其姻舊厚餽白金覲免死希文斥而拒之竟寘之法秩滿擢福建按察僉事理冤滯繩貪墨摧豪右無所顧避泉州進士李某調官廣西妻吳少而美故富民林肆欲圖之陽與某善遣二黠僕偕行至中道毒死某并其姪吳還肆納之某之族人訴於郡及臬司官受肆賂反罪訴者希文至廉得其情執而訊之果服罪漳州民

許某富而無子初以姪為後晚而妾生子因析貲產與姪而以子托之許死姪謬言子非叔出逐之奄有其貲希文按行至郡妾携孤訴其狀希文乃於市集諸小兒密以許之孤雜其中令父老別之父老獨指是兒狀類許某必其子也於是悉歸其貲晉江縣境有四閘水以蓄洩溉田數百頃為豪右專以自利歲旱細民羣訴希文罪其專利者民皆驩呼鼓舞今上皇帝嗣位大臣薦希文治行驛召至陛今職尋命捕蝗大名廣平循行阡

陌勞來不倦民不知擾而害隨息暨還贊肅憲紀駸駸有聲朝退方治事疾遽作而卒家無以為斂公卿賻治其喪始克襄事希文生洪武辛酉某月某日享年五十有七配張氏溫柔淑慧先希文三月卒於家子男二人長曰昇次曰昂孫男三人曰誠曰誼曰諛希文為人剛正清慎內恕外嚴寡嗜慾薄滋味歷仕中外二十餘年家無饒貲被服如寒士卒之日聞者莫不咨嗟歎悼嗚呼士之為世用才足以應變智足以決疑者非不有也

而求其清介有守執法不回似希文者殆亦不多見焉  
是故不可以無銘也銘曰

介如石兮維守之貞直如矢兮維心之平維介維直士  
德之偉人一鮮稱君乃兼美方其蜚聲震耀當時今焉  
云亡孰不悼思遙遙閩藩政傳永久奕奕憲臺名著不  
朽天台之原考卜維新安此宅兆永裕後人

故節婦高孺人墓誌銘

婦德莫重於貞良莫先於孝慈故為婦當盛年而喪所

天能秉志不貳奉姑以終養教子以成名足以表則於  
閨門其有益於俗化也大矣於其歿也銘之以為後世  
勸豈不宜哉若今吏科給事中高旭母孺人蓋其人也  
孺人諱妙善姓李氏福之望族女父宗善母林氏業儒  
而有淑德父亡時尚幼旦夕哀號聞者歎異侍母執麻  
臬治絲蠶無異成人姆教以孝經列女傳輒能記誦性  
行勤儉篤於孝敬家居不事華靡雖善女工而織紵組  
紃之外無他好伯父亡哭之如父兄有瘖疾彷彿象以通

其意及笄母擇所宜配得同邑高景陽氏以歸焉既歸  
孝於姑順於夫款遇賓親豐儉適宜景陽嘗痛父墓地  
圯於水欲更葬之貧不能具孺人輒傾粧資為助春秋  
祭祀必先期齋沐浴具務致誠潔既而景陽領鄉薦入  
太學以疾卒於京訃聞慟絕時姑年七十有四男女俱  
幼守節自誓早蠶而繰暮燈而織以為衣食資故姑有  
所托若子之存子有所賴若父之在及姑以天年終備  
棺槨衣衾營葬如禮遇有困乏者輒周之夫妹適陳而

家窶官有逋租弗克營辦孺人曰凡人急難尚相扶持况夫之同氣乎即出金帛予之邑里敬服嘗呼諸子語曰汝父亡時吾以姑老汝幼弗忍相從地下汝能力問學以繼先業吾後死無憾况汝父存日以過時失學為悔汝豈可自怠而貽他日悔乎於是每旦促旭兄弟就學旭弱冠以禮經魁於鄉念孺人老而弟幼浮沉於鄉十餘年宣德癸丑始以進士第五人試政天官正統丙辰擢給事黃門恩封未下而孺人以疾卒於家孺人生



洪武乙酉七月二十八日歿正統丁巳四月三十日享年六十有九子男二人長即旭次曰明先儒人卒女三人長適許清次適林順次適戶部主事鄭亮孫男四人曰璣曰均曰璋曰至孫女三人旭歸卜以某年某月某日合景陽之葬於懷安之興盛坑旭乃以亮所述行謁予泣請銘嗚呼先王之教始於閨門女子言動有史以昭勸戒故其化行而俗美後世治不古若女婦之善罕所表見故人心無勸而俗去古益遠矣若孺人之孝慈

貞淑婦道母道皆足為世式夫豈可使之無傳也哉銘

曰

莫白匪玉莫堅匪石不二所天乃婦之德猗歟孺人閨  
閨稱賢如玉之白如石之堅夫歿養姑一其終始以育  
以教克成厥子為婦盡道為母有儀俗化之勸慶澤之  
垂俗勸慶垂彌遠彌耀勒此銘辭以告厥後

故盤洲李處士墓誌銘

正統元年秋河南布政使李禎昌祺述職來京師造予

以其先考盤洲處士墓誌銘為屬曰惟禎之先人生有懿德善行足以表著於世卒葬以來且踰一紀而幽堂之銘迄今未刻用是夙夜痛心思無以逭不孝之罪謹撰次事實以請余與昌祺相知非一日且稔聞處士之賢不可以不銘乃序而銘之處士諱揆字伯葵其先金陵人宋南渡時有尚書郎諱義者徙家江西之吉水又數遷至今廬陵之螺岡曾祖諱良叔祖諱華道皆賢而隱於醫考諱廷賓仕元為天臨路醫學教授妣林氏處

士自少穎敏有奇志書過目輒不忘受毛氏詩於進士  
王紹值元季兵興從醫學公避亂往來弗及卒業逮國  
朝平定天下處士始復緝業將筮仕以為親榮而醫學  
公年老不欲其離膝下處士遂業醫以為養不復有仕  
進意而學行益修時吉之遺老宿儒若翰林修撰張弘  
毅兵部郎官伯顏子中刑部尚書吳山立皆折輩行與  
之遊山立以詩名家處士相與講論詩益工尤長於五  
言高古雅健有漢魏之風人因稱為李五言云處士事

親婉愉備至甘腴滫瀡之奉極力營致雖艱窘之際親以忘憂處弟妹恩誼尤篤家無間言其為醫務以利濟為心不求肥家凡疾者扣其治必往不擇貧富為趨舍尤善治竒疾衆之所不療者處士輒能療之前東宮說書周仁遠與處士家故連姻其子遘疾危甚延處士視之比至羣醫方集議不決處士診之曰脉洪數而心懣此內熱也當以涼劑解之即愈周氏館賓黃玉潤博洽知醫與處士談間因舉宋中興十將傳中語以諭用藥

之方處士為誦全傳不遺一言又問數事無不知者玉潤大駭遂贊於仁遠曰李君非止善醫其學問亦不易及也既而疾者愈玉潤為詞贈之還由是處士名益振值歲疫邑大姓劉氏闔門皆病親隣憇為所染無敢視者醫亦不赴處士聞之惻然曰為鄉人者患難相恤固其義也安可坐視其斃乎遂具藥餌携一老僕往宿其家蚤夜躬調治之越數日先愈其病甚者復勸諭其親隣使相與扶持月餘而疾者盡起處士乃歸鄉鄰之人

莫不義之處士為人寬厚簡澹喜愠不形介不立異  
和不詭隨故其所至人咸敬慕前後守令及當道者  
多欲薦之輒懇辭以止其學於諸子百家之言靡不該  
覽書札得晉唐人風致至於陰陽方技皆精其能晚年  
益致力於性理之學雖不授徒而樂為人講說郡邑後  
進之士皆尊事之每鄉飲必以首賓席名卿大夫之游  
宦往來經其郡者必造門訪問焉郡城之陰有洲臨水  
清曠可釣游去處士之居不半里處士日夕杖策往游

其間吟弄風月逍遙容與意甚適也因自號盤洲釣者故翰林學士解公縉紳為文美之初昌祺為禮部郎中處士嘗一至京視之其還也翰林諸公咸以詩贈行及昌祺布政廣西往返皆便道過家為處士上壽鄉人榮之處士嘗戒之曰孔子居鄉黨恂恂如也張湛下里門聖賢皆然汝可法之毋驕慢為吾之恥又曰當官操守必務終始汝其慎之苟違吾言非吾子也昌祺佩服惟謹遂以清白顯名而人稱處士善教其子焉處士生元



丁亥四月十五日卒永樂辛丑十一月二十九日壽七十有五比得疾猶日起正衣冠坐閱書親賓問疾從容談笑如常迨屬纊無一言之亂諸子請遺言曰吾願汝等勉為善而已且屬歛以深衣幅巾嗚呼處士可謂安於死生之際者矣處士初娶彭氏繼劉氏生子男四人長即昌祺次旭次循次芳女四皆適士族孫男十孫女七曾孫男二處士所著有盤洲漁唱藁若干卷永言集若干卷皆藏於家其葬在廬陵何山之原惟聖朝褒嘉

臣下恒推恩榮及其親以昌祺之賢久居方岳處士積善之報將膺寵贈有日矣揭德麗牲之石得不尚有待乎銘曰

韞矣盤洲士流之奇有德有言學充譽馳曷不仕進而隱於醫為子翼翼為兄怡怡家政允修鄉閭所儀恤難拯疾聿推厥施全活孔多獲報攸宜篤生賢嗣克顯明時方伯之貴名宗有輝紫誥頒恩褒寵有期嗚乎處士其存遠而廉貪敦薄高風可師何山之原有塚巍巍爰

詔來裔刻此銘詩

徐處士墓誌銘

翰林編修徐理之父處士孟聲以正統元年十一月廿八日卒於京師理兄弟遵治命將奉柩還葬于姑蘇某鄉之原乃踵門再拜泣請銘予與理同事史館不獲有辭遂撫大理評事張士謙所狀事行為叙次而銘之處士諱震孟聲其字也別號善菴世為蘇之長洲人曾祖孝基祖文禎父子復子復之弟子明乏嗣以處士後之

處士自幼至長篤厚謙慎行義樂善汲汲若不及其事親奉先以孝以誠洪武中子明以間右徙實京師嘗坐累當被逮處士欲代往子明切止之處士徑先赴獄久之會赦得釋人稱子明為有後四時奉祀必齋戒豐潔器物不親視不以祭其用財卹匱義以周鄉人尹某貸貲數萬為貿易已而盡費於家之婚喪納券請緩償期處士笑謂之曰子吾友也義有通財况以襄家之大事乎取其券焚之鄰有徐某謝某俱母老貧不能備養處

士厚給之俾生息以自資其教子治家嚴正而有法每  
念其先連世不仕而德善之積不涼後必有興者於是  
遣程從師受經不以祁寒盛暑廢其業家庭內外尊卑  
長幼秩如也其他處宗族朋友以及鄉黨悉井井可觀  
殆古所謂善士者歟其生以某年某月某日享年六十  
有六娶丁氏邑右族內助克賢先處士八年卒子男四  
長琪早世次璘次即程次瑛女一人許琳其婿也方今  
聖朝重褒嘉之典士之有官於朝者皆得榮及其親若

處士之善教子而理之克自樹立其寵命可指日待矣  
而躬弗逮其榮其亦可悲也夫銘曰

古稱善士一行己名猗歟處士匪一足徵其身雖嗇其  
嗣克承褒封將至躬弗逮榮沒云何悲譽也則馨我作  
銘詞永閱泉扃

故處士薩君墓誌銘

閩有純孝篤行之士薩君享年六十有六卒於家其子  
翰林編修琦將奔訃南歸迺持翰林修撰陳叔剛所狀

事行謁予泣拜求葬銘予與君同為閩人琦復同在館閣不可有辭遂按狀叙次而銘之君之先世居今北京宛平縣祖諱野之父諱仲禮仕元為福建行省檢校始家閩縣之通賢坊君諱琅字用謙七歲而孤母沙氏守節不貳篤意訓育之其舅孟相學行重鄉里君從之學事若嚴父暨長德器成就得舅氏之教為多焉君孝於事母家素貧至躬採薪拾穗以資養旨甘溫煖之奉恒竭力營辦而母不知其勞鄉人以孝子稱之有不善事

親者聞其風多感激改行里中早父老禱於神久弗應  
或曰薩孝子有至行必能致感求之偕禱果雨繼有火  
災又求君禳之火隨息母嘗遘疾更數醫弗效君憂惶  
無措每夜露禱北辰祈以身代時母不粒食七日矣忽  
甦曰適神人語我曰而子孝加爾壽三十四自是疾成  
風痺卧起須人扶掖君夫婦日夜不離側比母沒時乃  
三十四月云君哀毀骨立柱而後起服除與人言輒嗚  
咽流涕遇忌辰節序哀慟如初喪平生尚義於財不苟



取里中唐氏女往所親家適其家當籍沒女倉猝以布囊貯金珠首飾擲寄隣寓誤落君廢圃中君遊圃得焉訪知其為唐物也悉歸之鄉人馬某家被火以地售君君除之得白金一罌召還之馬分其半謝君君曰汝方值災吾忍受此耶堅却之女弟適福建都司斷事周某周來謁惟語以居官守法未嘗涉私非歲朔不造其廬藩臬諸公聞君名或欲致之一見即深避匿有白君行義擬薦之者輒固辭曰斯人道當然也若爾是眩名求

售矣其他教子處鄉黨卹窮匱事尤累累不可殫紀君  
生以洪武辛亥十一月九日沒正統丙辰十一月某日  
配林氏子二長即琦舉宣德庚戌進士選入翰林為庶  
吉士擢編修次璘早世女三俱適士族孫男一文昌鳴  
呼孝百行之本也君善事於所生又敦守節義卓卓可  
稱若此詎非所謂純孝篤行之士歟是宜有銘銘曰  
人有至行貴孝其親天有顯徵匪私其身其身不有慶  
鍾厥後爰及子孫奕世悠久

故河南府知府李尚德墓銘

士之為世用德足以有守才足以有用平易之政足以  
得民此其不愧平生永終譽也宜矣若故知河南府事  
李君尚德其殆庶幾矣乎君諱驥尚德其字也先世居  
清州曾大父紹宗大父輝祖始徙沂之剡城世業儒考  
諱壽康好善而樂施母某氏有懿行尚德甫六歲而失  
怙自幼穎敏嗜學從鄉先生遊以超出倫輩稍長為邑  
庠生謹言行勤問學師友敬愛之洪武癸酉以詩經領

鄉薦入太學歲丙子朝命拔太學生才貌魁傑者十有八人俱授給事中尚德預焉任戶科時關市譏商旅者往往發其囊笥窺覩為奸尚德奏罷之尋坐事免官已而被薦起知新鄉縣縣當四達之衝往來屬道尚德處之事不廢而下無苦間命葺爰舍置農具以撫輯逋逃來歸者至數千人庚辰以內艱去民相率乞留之者至於數四永樂初服除改知東安勸課農桑綏輯流亡事有病於民者輒請於朝罷免之邑故荒墟多狼嘗有豨

婦訴其子為狼噬者尚德禱於城隍深自咎責明旦狼死於其所今刑部尚書施公寔東安人聞而異之為紀其事而揚於縉紳間既而刑部侍郎李公昶暨素所知者文章薦之遂擢刑部郎中鞫獄詳慎人無冤抑嘗以崇教化重農桑卹民省徭重版籍育賢才優養軍士寬卹馬政擇守令汰冗員禮廉能抑倖進通鈔法十餘事陳於朝多見采納未幾坐事謫保安仁廟嗣位詔求賢工科都給事中吳彝首以尚德薦召還擢監察御史操

履益堅未嘗以經患難而渝其志循行郡邑以簡賢革  
貪為務又陳經國利民督農事察民情備邊儲省營造  
及海運邊防驛傳芻牧凡十事仁廟嘉納之嘗自語人  
曰予今叨職耳目當知無不言以盡分內事若掇拾人  
之短長以沽名則不為也暨考最蒙恩褒贈父母如制  
仍賜歸焚黃及還朝適命下簡廷臣為郡守遂受璽書  
出知河南府既下車求古循良所以用心者而推行之  
如興學校時地利均賦後弭盜賊審度量之類皆罄心

力暇輒閱書作為箴銘以自勵家居雖几席必端嘗曰  
細事既正則達之他務無往不正矣公署後植松竹梅  
每退食盤桓其中因曰彼三友而益我一夫得非四友  
乎遂號堂為四友郡嘗大疫捐俸市藥貯之廳事遇民  
有疾即與之賴全活者衆歲旱躬率父老禱於嵩嶽雨  
應期而至傍郡民訟不平者咸求決焉莫不心服而去  
守河南逾六年一日與賓客飲於四友堂談笑中瞑目  
而逝正統元年夏六月二十有七日也僚友耆民相弔

哭者皆失聲享年七十娶劉氏封孺人克勤內助子男  
五人長隣以通經舉授長垣縣教諭次傑英輔恭輔早  
世孫男二興道興邦孫女五以某年某月某日葬於某  
山之原隣以所次行實謁予泣拜請銘夫以尚德之才  
德兼茂幾於古之循良者如此是不可無言以永其名  
於無窮也銘曰

學優氣充德茂才豐敷歷仕途曰廉與公惟公不私惟  
廉有守人所罕能君則兼有民心其懷後肩其昌嗚呼



尚德可謂不亡

故嘉議大夫禮部左侍郎章君墓銘

國家教養士類于茲有年故四方譽髦之士彙進輩出  
效用於時而其竭心盡誠不負所任者若故嘉議大夫  
禮部左侍郎章君其一也君諱敞字尚文別號質菴世  
居越之會稽高祖斌宋景定中鄉舉第一人曾祖諱某  
不仕祖黼父昇俱以君貴贈嘉議大夫禮部左侍郎母  
某氏累贈淑人君自幼穎敏嗜學為父母鍾愛暨長為

郡庠生師友咸器重之永樂癸未領鄉書首薦明年登  
進士第選入翰林為庶吉士偕狀元曾棨等二十八人  
績學中祕與脩永樂大典壬辰冬授刑部主事癸巳命  
同諸儒纂輯五經四書及性理大全書成重膺賜賚時  
近京西山有盜肆劫掠逮捕數百人鞫之多不服君察  
其寃惟拘其辭色異者一人餘悉遣出期翌日復至同  
官爭不可君卒遣之明旦至如約後勘驗其人皆非盜  
而一人辭色異者即盜也衆始服其明復有商夜宿都

城外千戶何氏肆人掠其財商疑何欲訟之何不克自  
白乃訴於官而自經死太宗皇帝聞其故命司捕者三  
日不得盜抵死司捕者乃妄繫何鄰近二十餘家別取  
褚幣如商之數而以盜加之君察其誣辯理之皆得釋  
丙申轉員外郎階奉議大夫尋遷郎中丁外艱起復改  
吏部考功洪熙初賜誥命階奉議大夫丁內艱服除調  
驗封宣德庚戌擢行在禮部右侍郎進階嘉議大夫奉  
詔往安南命黎利權署國事暨宣詔利遣人白相見禮

君語之曰吾奉詔命至爾蓋小國一首長能盡禮於使者即所以尊敬朝廷何用白為利聞即趨拜坐于下令所親給侍左右數為巧媚辭欲眩以聲色君正色待之終不為動及還餽贖珍異一無所受利曰假此以將誠爾何拒之甚君曰吾奉命令爾撫輯一隅以廣皇上一視同仁之恩豈為賂至耶利乃以所餽物付貢使致之且戒關吏俟使者出即閉關君付知之及關親閱所貢方物餘悉封付關吏及利死君復奉命令利子麟權署

國事關吏見曰此天使前卻金者比還卻所贖如初麟不敢更進蓋知君不可以利動也聖天子嗣位之初平陽王復封晉王即以故護衛官軍田廬為請君受命往理之至則較其軍數量以田廬歸之餘給於民王不悅君啓曰國中先三衛今止一千戶所以三衛田廬而歸一所之人得無過乎且朝廷以藩屏望殿下國內軍民宜均愛之庶副皇上至公之意王悟曰使方面諸官早有此言吾亦豈敢上煩朝廷哉還奏上嘉之未幾遷左

侍郎君之莅政思慮精審防範周密以國家統理天下既久典禮品式有因革輕重之殊事或隨時損益有先後矛盾之異而吏胥亦稍緣此為奸於是白尚書胡公取國初至今凡所行條格籍記之付四司使得參酌而行以是事獲適宜奸弊頓革嘗有黠吏嗜酒怠事且增損公牘即寘於法羣吏自是悚息不敢為非太醫院每舉醫者人往往假以復怨及徵至多弗諳醫君察知之遂偕尚書奏革其弊比歲僧道數給度牒輒以千計君

與尚書請依洪武例三歲一給凡僧道出家及舉為僧道官者止於所居封內不容越籍冒濫四夷貢使日給廩餼庖人每侵剋之君聞之曰小人為口腹計而使朝廷薄懷柔遠人之禮可不禁乎即令所司具日給之數付通事者或給不如數乃從而督治之自是遠人以為朝廷待之加厚也君生洪武丙辰十一月十有四日歿正統丁巳十二月四日享年六十有二訃聞遣官諭祭命有司治喪葬君為人性質端厚接人待物意氣豁然

調貧濟難尤克盡心在刑部時有同官尤許二人坐累  
謫戍邊君資之甚厚後又汲汲欲拔之既而許果膺薦  
為御史歿又為之經理喪事恤其孤嫠尤既老遣其子  
代戍而窘甚乃贈以衣裝金幣且遺書所親在邊者令  
周之其輕財重義類如此君問學優裕為文簡暢所著  
有質菴藁藏於家配葉氏先卒累贈至淑人繼趙氏封  
淑人子男五人長璨次瑾葉出也瑾丙辰進士璫璵璜  
趙出也女一人適錢康孫男一曰恩孫女四瑾將奉柩



葬其鄉稷山之原乃匍匐泣拜請銘予素知君存心行已居官臨政皆有足稱者故不辭而銘之銘曰

於皇太宗乘時之隆登崇俊乂以熙治功巍巍章君奮身科第丕承寵光績學中祕爰受恩命勤勵自將偕諸髦士以頡以頽迺職秋官式敬由獄迺登正郎天官之屬祇事列聖垂三十年厥績懋著亞卿式遷奉使南交誕播威德褫其奸驕安彼反側惟守之確惟績之勞視彼金帛藐若毫毛帝用爾嘉信任一致君亦攄誠終始

弗替夫何邁疾奄忽云亡宸章諭祭煜乎恩光煜乎恩  
光垂之永久誌幽有銘式昭不朽

故禮部祠祭主事干汝霖墓銘

禮部主事干需汝霖以疾卒於正統丁巳五月二十有  
九日次子善偕從姪欽自家奔訃來迎其柩歸臨之新  
淦將卜葬於某鄉某山之原預以翰林修撰習嘉言所  
述事行謁予泣拜請銘予素嘉汝霖之為人乃按狀而  
叙之曰干氏本春秋時宋大夫隼之後在晉有諱寶者

仕為始安太守其裔某官新淦子孫因家焉遂為新淦  
人世居學宮後十一傳至叔沂者為汝霖高祖家饒於  
貲而篤忠厚人稱長者曾祖茂翁有隱德祖利賓始徙  
居縣之東門以故宅讓諸兄父子楫淳厚有古君子風  
母龔氏俱壽考在堂汝霖生而穎異嗜學績業邑庠讀  
詩得溫柔敦厚之旨嘗以所業試藩闈不偶益自克勵  
稍暇兼工真草書前翰林學士解公見而竒之因語以  
書法要妙遂大有得永樂乙亥少保金文靖公時為學

士以其善書薦入翰林已而擢中書舍人階徵仕郎洪  
熙初蒙恩封父如其官而母為孺人九載秩滿遷禮部  
祠祭主事仍從事翰林宣德庚戌與修兩朝實錄書成  
受白金襲衣文綺之賜未幾歸省二親即召還京益慎  
厥職復與修宣廟實錄垂成而卒聞者莫不嗟惜之汝  
霖生洪武甲子十二月十有七日得年五十有四娶周  
氏子二人曰明曰善其三曰冀者則劉氏出也女璟真  
適同邑饒顯慶瑄真適劉中和寶真幼在室汝霖為人

溫雅詳實動循禮度性孝友善事二親居官得四方之物有資服食者輒封識以歸丁未秋父以謝封官恩至京留養官舍順意承志務得其歡遇諸弟必盡恩愛待師友敬久弗衰今國子祭酒貝君昔嘗教其邑而汝霖師之及已貴益謹弟子禮至於見素所交游者輒握手歡如平生其有未善則委婉以告之或嬰憂患死喪而不克自給者必推所有以賙之公退則彈琴賦詩各適其趣或肆意草書尤臻其妙得者皆愛重焉汝霖既沒

人皆謂其言寡而信行端而謹可謂君子矣而官未至大夫壽不至於週甲是大可哀也故為銘曰

善而膺福乃理之常厥福有永其報乃彰嗟嗟昊穹曷為爾嗇位不稱才壽不滿德維善之報弗爽于天不在其躬維後之賢金川之陽溪山盤遠刻銘於茲以永厥紹

贈吏部稽勲主事楊君墓銘

世之克成其子以有祿位而膺國家褒贈之典者非偶

然也蓋由積善之久餘慶之流而有以致之若故贈吏部稽勳主事楊君彥成有足見矣楊氏為唐祭酒膳之後以官留蜀之眉州其裔有曰壽者彥成十世祖也徙居廣安之大竹縣元季寇盜擾攘多妄殺人彥成父壽卿時以衆推為萬戶獨能率義兵保陣鄉邦人賴以寧老稚私相祝曰全活我輩者楊公也今無以報願公之子若孫世世盛大彥成生九歲而失怙母李氏鞠育教誨底於成立既壯遷居長壽之大城河東平居性端重

善事母承順之際詞氣雍容母之所欲務適其意凡旦夕供養之具極力營辦而不辭勞春秋祀先俯仰齋慄儼若祖考之臨尤謹於言行嘗語人曰人之速戾於厥躬者由弗慎致爾言行苟慎則何戾之有至於處友朋以誠篤遇鄉里以和易歲或凶歉往往出餘粟以濟貧窮而人皆稱為長者其生以元至正庚寅九月二十五日歿今永樂壬辰八月十有六日得年六十有三其子若孫以某年某月某日葬於宅右之山從吉卜也歿後



其孝道事之愈謹其處宗黨待親屬接賓朋篤於信義  
恩禮不替歲乙亥被徵入欽天監無何授五官司歷轉  
保章正遷夏官正又進為監副先後三十餘年敬慎小  
心夙夜匪懈用是上契聖心寵任益隆及擢為監正祇  
勤如初尤好善喜施薦拔士類獎勵後進惟恐不及洪  
熙紀元仁廟上賓宣宗皇帝嗣位召問山陵之事條對  
稱旨受白金綵幣之賜宣德辛亥蒙賜誥命階奉議大  
夫又推恩贈父如其官母為宜人乙卯冬九載秩滿加

授奉政大夫食正四品祿仍掌監事丁巳十二月二十一日卒於官享年六十初娶袁氏贈宜人繼馬氏俱有賢行克勤內助子男一人曰永昌克世其業兼究心地理以與視宣廟陵寢授本監漏刻博士女四人福慶適天文局賈瑜福貞適陰陽典術鄭亮福善適遵化衛指揮呂整福源尚在室皆袁氏出也馬氏女一曰福延孫男一人孫女二人將以戊午二月六日奉柩葬於順天府宛平縣香山鄉麻峪之原永昌先期奉司經局洗馬

藺君從善所叙事行拜謁請銘惟歷象之學豈易言哉  
濟民承世業之懿遭際聖明效用於朝推步測候不爽  
毫髮使天象不失其正人事不失其時非其術專而精  
能若是乎先是濟民有疾猶力疾趨朝上疏懇乞骸骨  
上不從所請遣醫往視數四濟民語子及孫曰吾幸以  
數術得官生平弗以才識自矜功能自銜茲荷聖眷如  
此其何以報及訃聞上悼惜之遣官諭祭夫以濟民之  
端慎重厚歷仕四朝克舉其官而游膺寵命如此是不

可以不銘銘曰

繫天道兮杳乎難知維聖人兮欽若不違命官測候兮  
分方與時術不違天兮政不失宜偉哉濟民兮察星厯  
於毫釐仕歷四朝兮妙於步推視羲和而無忝兮於祖  
考而有輝夫何下壽之甫登兮天不憖遺幸子之才兮  
克紹弓箕身雖遐逝兮名則永垂

文敏集卷二十四